



## CONVENIO ENTRE A FUNDACIÓN CIDADE DA CULTURA DE GALICIA E O INSTITUTO GALEGO DE PROMOCIÓN ECONÓMICA PARA A REALIZACIÓN DE ACTIVIDADES FORMATIVAS E DE TUTORIZACIÓN DE PROXECTOS NA CIDADE DA CULTURA DE GALICIA

Santiago de Compostela, na data de sinatura dixital

### REUNIDOS

Dunha parte, a **FUNDACIÓN CIDADE DA CULTURA DE GALICIA (ou Fundación)**, con domicilio social na Cidade da Cultura de Galicia situada en Santiago de Compostela, Monte Gaiás s/n, e provista do NIF G15721640. A Fundación está inscrita no Rexistro de Fundacións de Interese Galego co número 73.

Está representada neste acto pola súa directora-xerente, dona Ana Isabel Vázquez Reboredo, conforme aos poderes outorgados para o efecto polo Padroado da Fundación o 16 de decembro de 2016, poder escriturado ante notario o día 19 de decembro de 2016.

E doutra, o **INSTITUTO GALEGO DE PROMOCIÓN ECONÓMICA**, con domicilio no Complexo Advto. San Lázaro, s/n - 15707 Santiago E CIF Q-6550010-J.

Está representado neste acto por Don Fernando Guldrís Iglesias, na súa condición de director xeral do Igape en virtude da delegación de facultades de 23 de decembro de 2016 do presidente do Igape feita pública mediante Resolución de 25 de xaneiro de 2017 (DOG nº 23, de 2 de febreiro de 2017).

As partes, segundo interveñen, recoñécense, mutua e reciprocamente, a capacidade legal necesaria e a representación suficiente para formalizar o presente convenio (ou "Convenio"), e ao efecto

### EXPOÑEN

**PRIMEIRO.-** Que a **Fundación Cidade da Cultura de Galicia** (en diante, **Fundación**) foi constituída o 27 de decembro de 1999, como "*organización de natureza fundacional, de interese galego, sen ánimo de lucro, cun patrimonio afecto de xeito duradeiro á realización dos fins de interese xeral propios da Institución*". Constitúe o obxecto da Fundación Cidade da Cultura de Galicia a *creación, explotación e promoción de áreas ou centros de conservación, produción, exhibición e consumo cultural, comunicativo e tecnolóxico que constituía un espazo multifuncional, multidisciplinar e aglutinador propicio para a interacción cultural*.

Segundo o artigo 7 dos seus estatutos, para a consecución dos fins mencionados no parágrafo anterior, a Fundación pode realizar seguintes actividades:

- "a) As necesarias para converterse nun actor clave na difusión cultural, que serva de punto de encontro entre os cidadáns e a cultura.*
- b) As que contribúan a desempeñar un papel destacado no proceso de enriquecemento/aprendizaxe cultural da cidadanía, con especial énfase na adopción e uso das novas tecnoloxías.*
- c) As tendentes a propiciar o achegamento da Cidade da Cultura de Galicia dun xeito físico á cidadanía, servindo como espazo de desenvolvemento de actividades non estritamente culturais, con especial énfase no lecer, o contacto coa natureza e o deporte.*
- d) Cantas dinamicen o sistema cultural galego, promovendo a difusión e conservación da nosa cultura, e a formación dunha comunidade artística vibrante, atendendo tanto a autores de referencia como a novos talentos ou a cultura de base.*
- e) As que fomenten a interrelación e os proxectos en conxunto entre axentes de distintos ámbitos*





*das industrias culturais e creativas, con especial énfase na cooperación interrexional e a colaboración pública e privada.*

*f) As axeitadas para posicionar o Gaiás como referente internacional de reflexión, debate e formación no ámbito da innovación na xestión cultural, que contribúa á profesionalización dos diferentes axentes e das súas iniciativas.*

*g) As que impulsen o Emprendemento empresarial no ámbito das industrias culturais e creativas, con especial énfase en proxectos que favorezan a innovación, tanto tecnolóxica como non tecnolóxica, e a súa transferencia aos sectores máis maduros do tecido produtivo, servindo como plataforma de desenvolvemento e promoción da marca país Galicia.*

*h) As actividades e accións que contribúan a converter á Cidade da Cultura de Galicia nun proxecto economicamente sostible e socialmente rendible, incorporando novos socios estratéxicos, tanto públicos como privados, e diversificando as fontes de financiamento para acadar a sustentabilidade do proxecto con independencia do ciclo económico."*

O Gaiás está intimamente ligado ao fomento do Emprendemento e das Industrias Culturais en toda a súa extensión, programando actividades formativas e de asesoramento, con especial énfase en proxectos que favorezan o crecemento económico e a creación de emprego, actuando como elementos vehiculares na transmisión da identidade cultural, aspecto este esencial na difusión e promoción da diversidade cultural e a súa transferencia aos sectores máis maduros do tecido.

A Fundación Cidade da Cultura de Galicia concíbese como unha plataforma de proxectos para o desenvolvemento da cultura e da sociedade galega; crea oportunidades e dinamiza o conxunto do sistema cultural galego a través do impulso e a proxección cultural no seu sentido amplo, innovador e internacional. Este tipo de actividade da Fundación deriva do *II Plan Estratéxico da Cidade da Cultura de Galicia*, aprobado polo Consello da Xunta.

Neste sentido, no seu plan de actividades, indícase como pilar estratéxico da actividades do Gaiás, o *" Fomento da colaboración con proxectos comúns con entidades presentes na Cidade da Cultura: Aproveitar a oportunidade única que se dá no Gaiás, coa presenza de entidades e institucións vinculadas á promoción das Industrias Culturais, ao emprendemento creativo, ao desenvolvemento tecnolóxico e a innovación, á investigación e a educación para elaborar proxectos conxuntos, a través da hibridación de estratexias e eixes de actuación comúns. Unha fortaleza única na Cidade da Cultura, que non se dá noutros centros de referencia e ten a potencialidade para converterse en elemento de identidade diferencial."*

**O II Plan Estratéxico fixa como liña de acción para o período 2022-2027, a seguinte:**

### **Acción 1.7.3 Programación regular de emprendemento**

Relación co marco estratéxico	OE 3. Impulsar os procesos de investigación, innovación e formación no sistema cultural galego. OO 3.2 Impulsar iniciativas innovadoras de apoio ao talento, aos emprendedores e aos creadores.
Xustificación da necesidade	A Cidade da Cultura foi pioneira na promoción do emprendemento cultural e creativo en Galicia, sendo quen de aglutinar e colaborar con entidades relevantes neste eido de Galicia e España. Cómpre manter este posicionamento e continuar co apoio a novos proxectos emprendedores.
Obxectivos	<ul style="list-style-type: none"> <li>- Continuar co posicionamento da Cidade da Cultura como unha entidade relevante no eido do emprendemento cultural e creativo, engadindo novas accións neste eido e no da innovación social e o seu vínculo cos ODS, a través de programas propios ou colaboracións con entidades.</li> <li>- Colaborar con entidades do eido da promoción económica e emprendemento.</li> <li>- Mellorar a taxa de supervivencia das novas empresas culturais e creativas galegas.</li> </ul>





Descrición da acción	Encontros profesionais, xornadas informativas e de mentorización e soporte, a desenvolver en colaboración con entidades con competencias neste eido. Nesta nova etapa, procurarase centrar a actividade en proxectos e novas empresas culturais e creativas, prestando servizos de valor máis aló de ser unha solución espacial.
Tarefas	<ul style="list-style-type: none"><li>- Programas actividades en colaboración cos socios estratéxicos.</li><li>- Executar un paquete de medidas coordinado de apoio ao emprendemento no eido cultural e creativo</li></ul>

A Fundación pertence ao sector público da Comunidade Autónoma de Galicia, e como tal está incluída no ámbito de aplicación da Lei 16/2010, do 17 de decembro, de organización e funcionamento da Administración xeral e do sector público, de acordo co previsto no artigo 45 desta lei.

En virtude do anterior, a Fundación asume como propias as medidas a adoptar polo conxunto da Xunta de Galicia para paliar a situación de crise económica que sofre, entre outros, o sector cultural galego, debido a crise sanitaria provocado pola COVID-19.

Neste sentido, a Xunta de Galicia aprobou, en Consello da Xunta o 30 de abril de 2020, un Plan de reactivación dos sectores cultural e turístico fronte aos efectos derivados da COVID-19, entre cuxas medidas a adoptar, se atopan as tendentes á formación, profesionalización e mellora da competitividade no sector cultural e de asesoramento e consultaría para empresas e profesionais culturais.

Estas medidas teñen por obxectivo o de favorecer o consumo de produtos culturais, mediante o mantemento e impulso da actividade, incentivar o mantemento da industria cultural galega e do emprego ante as restricións motivadas pola crise sanitaria, apoiándose tamén na programación do Xacobeo 2021 e impulsar medidas de fomento da creatividade e da produción cultural.

Todas estas medidas, enclávanse nos seguintes eixes de actuación no ámbito cultural;

1. Activación da industria cultural galega
2. Mantemento do emprego cultural
3. Fomento do consumo cultural
4. Formación, profesionalización e mellora da competitividade

**SEGUNDO.-** Que o **Instituto Galego de Promoción Económica** (en diante, o **Igape**) é a axencia, adscrita á Vicepresidencia segunda e Consellería de Economía, Empresa e Innovación, para o desenvolvemento económico de Galicia.

A misión do Igape é a de apoiar todas as actividades que contribúan a mellorar o sistema produtivo alego, facilitando os procesos de creación, consolidación e crecemento empresarial.

Os obxectivos que pretende levar a cabo pódense concretar en:

- Impulsar a creación de novas empresas e fomentar decididamente o espírito emprendedor.
- Incrementar a competitividade das empresas galegas a través da innovación e o desenvolvemento tecnolóxico.
- Atraer investimento a Galicia.
- Facilitar a internacionalización.
- Apoiar a cooperación e os proxectos colectivos de empresas galegas.

**TERCEIRO.-** Que en data de 27 de xullo de 2021 o Igape subscribiu un convenio coa Fundación EOI F.S.P. para a realización de accións de formación e titorización no marco do proxecto Coworking. Esta actuación baséase na creación dun espazo conxunto destinado ao establecemento de emprendedores, previamente seleccionados, que achegarán proxectos temperáns de previsible valor





para a sociedade. En concreto seguirase a metodoloxía Lean Startup que persegue acelerar o proceso para identificar a viabilidade dos proxectos dos emprendedores.

**CUARTO.-** Que o Centro de Emprendemento (CEM) é un proxecto promovido pola Fundación Cidade da Cultura que posibilita a incorporación de proxectos empresariais innovadores. Esta infraestrutura de acollida temporal está ideada para fomentar o desenvolvemento xerminal de iniciativas de interese para a Comunidade Autónoma de Galicia, constituíndo un espazo físico que ofrece, espazo para a ubicación de empresas e prestación de servizos, permitindo mellorar as súas expectativas de supervivencia.

Co fin de impulsar os apoios e a formación que reciben os emprendedores, ambas partes entenden que o Centro de Emprendemento do Gaiás é un lugar idóneo para a realización do PROGRAMA GO2WORK ESPACIO COWORKING (EOI) impulsado polo Instituto Galego de Promoción Económica (Igape), para o desenvolvemento de actividades formativas e de titorización de proxectos emprendedores dalgúns dos seguintes ámbitos dentro das industrias culturais e tecnolóxicas: deseñadores, ilustradores, profesionais da comunicación, escritores, guionistas, editores, representantes e promotores artísticos, produtores, xestores culturais, programadores de aplicacións informáticas e proxectos culturais na internet, e aqueloutros con vinculación en proxectos que fomenten innovación cultural e as novas tecnoloxías.

Con este convenio asegúrase así a realización de diversas actividades tendente á promoción do Emprendemento Cultural.

Por isto, para acadar unha maior eficacia na execución de actuacións, dado o interese común das partes asinantes, que teñen intereses coincidentes, é polo que asinan este convenio de colaboración, de acordo coas seguintes

## CLÁUSULAS

### PRIMEIRA.- OBXECTO

É obxecto deste convenio a colaboración de ambas partes para que o Centro de Emprendemento (CEM) da Cidade da Cultura de Galicia albergue a realización do PROGRAMA GO2WORK ESPACIO COWORKING (EOI) impulsado polo Instituto Galego de Promoción Económica (Igape), para o desenvolvemento de actividades formativas e de titorización de proxectos emprendedores.

Estes emprendedores pertencerán a algúns dos seguintes ámbitos dentro das industrias culturais e tecnolóxicas: deseñadores, ilustradores, profesionais da comunicación, escritores, guionistas, editores, representantes e promotores artísticos, produtores, xestores culturais, programadores de aplicacións informáticas e proxectos culturais na internet, e aqueloutros con vinculación en proxectos que fomenten innovación cultural e as novas tecnoloxías.

### SEGUNDA.- COMPROMISOS DAS PARTES

En virtude do presente convenio, a **Fundación** obrígase a;

A cesión gratuíta dos seguintes espazos;

- **Espazo formativo (Sala Off)**, segundo o calendario de eventos da Fundación Cidade da Cultura e a súa utilización quedara supeditada a súa dispoñibilidade.

Para a reserva do espazo deberan de poñerse en contacto co Departamento de Eventos da Fundación Cidade da Cultura.

A Salas non incluírá persoal técnico, polo que para manexar os equipos audiovisuais será necesario a contratación de persoal especializado.





Por outro lado, non estará permitido, introducir ou consumir comida ou bebida (agás auga embotellada) ou desprazar e mover do seu lugar cadeiras, mesas ou outras pezas de mobiliario.

O horario de acceso ás instalacións do complexo da Cidade da Cultura de Galicia é libre, condicionado aos horarios propios da Cidade da Cultura de Galicia, que se informarán con suficiente antelación.

Os servizos e acceso a zonas comúns dos espazos Cotraballo e Viveiro estarán dispoñibles os días hábiles que anualmente determina el calendario laboral local, de luns a venres de 08:00 horas a 22:00 horas, e sábado de 08:00 h a 15:00 h.

O acceso fora deste horario e calendario regularase mediante petición dos interesados nos termos e procedemento que estableza a Fundación Cidade da Cultura de Galicia.

- **Salas de reunións do Centro de Emprendemento**, segundo dispoñibilidade da mesma.

Non poderán ser utilizados para a realización de actividades alleas ao seu cometido principal e de non estar dispoñibles, se atenderán as peticións por rigorosa orde de solicitude.

O Igape deberá informar aos seus emprendedores acerca das normas de funcionamento das salas de reunións do centro así como indicaranlles claramente cales son as zonas de acceso e tránsito do edificio.

En virtude do presente convenio, o **Igape** obrígase a;

1. Realización da convocatoria ou edición do proxecto Coworking en Galicia que albergará o Centro de Emprendemento (CEM)
2. Formación no marco dun Espazo de Traballo Colaborativo mediante o desenvolvemento de talleres de formación para potenciar o desenvolvemento de competencias de emprendemento e en xestión de proxectos seleccionados.
3. Proceso de titorización particular aos proxectos seleccionados.
4. Realización de diferentes eventos co obxectivo de favorecer o networking entre os emprendedores e demais axentes do ecosistema emprendedor, integrándoos coas actividades do CEM.
5. Facerse cargo, de ser o caso, dos custes relativos ao persoal técnico necesario para manexar os equipos audiovisuais das salas cedidas, para o cal deberá contactar previamente co Departamento de Eventos da Cidade da Cultura de Galicia.
6. Destinar o espazo ocupado no CEM ao uso para o que se reserva, non podendo ser utilizado para o desenvolvemento de actividades distintas ou daquelas outras que non estean expresamente autorizadas, por escrito, pola Fundación.
7. Identificación, dando traslado á Fundación, de calquera persoa que acceda ou permaneza nos espazos de Cotraballo e Viveiro do CEM. A Fundación se reserva o dereito a denegar a admisión ao centro de calquera persoa que poida ser considerada prexudicial para a seguridade do complexo, dos edificios ou dos seus ocupantes.
8. Respetar as normas establecidas pola Fundación Cidade da Cultura, en materia de estética do edificio, identidade corporativa, horarios e outra normativa de uso que se poida esixir.





9. Respetar as normas de hixiene e preventivas que a Fundación poida establecer. En particular, Igape obrígase a non introducir nin depositar no local cedido materiais nocivos, insalubres ou perigosos ou calquera outros que, pola súa natureza ou manipulación, poidan producir molestias ou malos olores.
10. Non realizar, sen autorización previa, expresa e por escrito, da Fundación, no espazo ocupado no CEM nin na zona de servizos comúns, ningunha clase de obras de reparación, conservación ou mellora. En todo caso, á finalización da ocupación, Igape entregará o espazo limpo e co equipamento e mobiliario, nas mesmas condicións nas que lle foron entregados.
11. Conservar en perfecto estado de funcionamento e seguridade, tanto o espazo ocupado no CEM coma o seu equipamento e instalacións fixas de electricidade, rede de datos e telefonía.
12. Contar cun seguro que cubra de forma suficiente os danos que se poidan producir nas instalacións cedidas a Igape tanto a bens propios ou de terceiros, cando ditos danos no sexan consecuencia de actos ou omisións imputables á Fundación ou a terceiros dependentes da mesma.
13. Non ceder, subarrendar nin traspasar, de forma total ou parcial a terceiros, o espazo ocupado no CEM para outra finalidade que non sexa o obxecto deste convenio. Así mesmo, a extinción do convenio polo transcurso do termo convindo, non dará dereito a Igape a indemnización ningunha a cargo da Fundación.
14. Igape deberá contar en todo momento coas Licenzas Administrativas tanto locais e autonómicas coma estatais, que amparen a totalidade das actividades que desenvolva, e deberá cumprir fielmente a normativa vixente en materia de prevención de riscos laborais e canta sectorial exista en materia de seguridade e deberá satisfacer a totalidade dos tributos que por calquera concepto graven a súa actividade. Serán de conta e risco de Igape a obtención dos permisos e licenzas que resulten necesarios para a apertura e o desenvolvemento da súa actividade, sendo ao seu cargo todos os impostos, arbitrios e demais contribucións que se impoñan, correspondentes ao negocio ou por razón deste.
15. Igape obrígase a permitir o acceso ao espazo, ao persoal asignado pola Fundación, e aos operarios ou industriais mandados por esta, para a realización, inspección e comprobación de calquera clase de obras ou reparacións que afecten ao espazo cedido, dentro do horario normal de apertura. En caso de urxencia ou forza maior, poderá tamén a Fundación, por si ou por medio de persoas autorizadas, acceder ese espazo fóra das horas de apertura ou funcionamento, para atender as reparacións ou revisións precisas e adoptar as medidas necesarias. Nestes casos, darase conta inmediata ao arrendatario do actuado.

### TERCEIRA.- FINANCIAMENTO

O convenio non comporta gasto para ningunha das dúas partes.

No caso da Fundación, os custes repercutidos serán os ordinarios e propios da súa actividade.

No caso do Igape, a formalización do presente convenio supón o aforro dos custos derivados da cesión gratuíta do espazo.

### CUARTA.- RESPONSABILIDADES

A Fundación Cidade da Cultura no se fai responsable do material de traballo que Igape poida manter nas instalacións.

En concreto, a Fundación Cidade da Cultura non se fará responsable do roubo, perda ou deterioro de maquinaria, ferramentas, instalacións ou de calquera outro elemento, que se encontren situados dentro do espazo ocupado, sexa cal fora a causa que o produza dende o momento de vixencia do





presente convenio. A vixilancia e seguridade do mobiliario e equipamento da súa propiedade serán por conta de Igape.

De igual forma, a Fundación quedará exonerada de calquera responsabilidade que puidese resultar do exceso de ocupación por persoas do espazo cedido, que de ningún modo poderá superar a normativa en vigor nin as condicións específicas do Centro de Emprendemento obxecto do presente convenio. Igape será o único responsable de cantos danos, tanto físicos coma materiais, poidan ocasionarse aos ocupantes e terceiros, e sexan consecuencia, directa ou indirecta, das actividades exercidas por este ou os seus dependentes e dos servizos que preste, eximindo de toda responsabilidade á Fundación.

O asinamento deste convenio non implica relación laboral, contractual ou de calquera outra índole entre a Fundación Cidade da Cultura e os profesionais dependentes de Igape que vaian desenvolver as actividades previstas no acordo, ou terceiros que colaboren na realización do obxecto do convenio, de tal xeito que non se lle poderá esixir á Fundación Cidade da Cultura de Galicia, responsabilidade ningunha, nin directa, nin subsidiaria, polos actos ou feitos acaecidos no desenvolvemento do acordo.

#### QUINTA.- COMISIÓN DE SEGUIMIENTO

Establécese unha Comisión de Seguimento do presente convenio integrada por un mínimo de dous representantes por cada unha das partes asinantes deste convenio. Os membros desta comisión poderán ser substituídos polas persoas que estes designen. A substitución, con carácter definitivo ou temporal, de calquera dos membros da Comisión de Seguimento, será anunciada na convocatoria de reunión correspondente, e quedará debidamente reflectida na acta da mesma.

Esta comisión estará presidida por un dos representantes da Fundación, e actuará como secretario un dos representantes do Igape.

A Comisión de Seguimento asumirá, entre outras, as seguintes funcións:

- Supervisar a execución dos proxectos.
- Resolver os problemas de interpretación e cumprimento que se deriven do presente convenio.

A comisión poderá reunirse en sesión constitutiva no prazo dun mes dende a sinatura do convenio e poderá reunirse cantas veces estimen oportuno as partes, para mellor cumprimento e execución deste convenio, e por iniciativa de calquera delas.

O funcionamento da Comisión de Seguimento farase ao abeiro do réxime xurídico dos órganos colexiados contido na sección III, do capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

#### SEXTA.- PROTECCIÓN DE DATOS

##### 1. Tratamento de datos persoais das partes intervinientes no convenio

As partes intervinientes manifestan ter sido informadas, respecto dos seus propios datos persoais que se faciliten para a formalización e o adecuado desenvolvemento deste convenio, conforme ao disposto no artigo 13 do Regulamento 2016/679 (UE) xeral de protección de datos persoais (en diante, RXPD) e na Lei orgánica 3/2018, do 5 de decembro, de protección de datos persoais e garantía dos dereitos dixitais. A lexitimación para o tratamento dos datos, será a execución do presente convenio.

No caso de que, no ámbito deste convenio, os intervinientes se facilitasen respectivamente datos persoais de terceiros, incluídos os relativos ao persoal ao seu servizo, estes serán tratados para o cumprimento dunha misión de interese público ou o exercicio de poderes públicos, debendo informar previamente á súa comunicación aos interesados dos extremos previstos no devandito artigo 13.





## 2. Deber de confidencialidade das partes intervinientes no convenio

As partes intervinientes deberán respectar o segredo profesional e, en consecuencia, manter absoluta confidencialidade e reserva sobre a totalidade dos documentos e informacións que lle foran confiados para a formalización do convenio ou que sexan elaborados con ocasión da execución do mesmo. Así, quedan expresamente obrigadas:

- a utilizar a devandita información exclusivamente no ámbito deste convenio e para as finalidades previstas no mesmo;
- a non comunicala, nin total nin parcialmente, a ningún terceiro sen autorización expresa do emisor salvo nos casos expresamente previstos na lei, esixindo idéntico compromiso ao persoal que empregue ou co que colabore na execución do convenio;
- a facilitar o acceso á información unicamente ao persoal que a necesite para o desenvolvemento da devandita relación, a quen se comunicará a obrigaçión de tratar a información á que se lles dá acceso con carácter estritamente confidencial;
- a aplicar medidas de cautela e protección e destruír en calquera momento a documentación escrita recibida se así o solicita a parte que a fornece;

Considerarase información confidencial aquela á que os intervinientes accedan en virtude do presente convenio, especialmente a de tipo técnico ou tecnolóxico, de produçión, de mercadotecnia, administrativa, ou económico-financeira, sempre que non teña carácter público ou notorio.

### **SÉTIMA.- RÉXIME XURÍDICO E SOLUCIÓN DE DISCREPANCIAS**

O presente convenio ten natureza administrativa, e como tal está excluído do ámbito de aplicación da Lei 9/2017, do 8 de novembro, de contratos do sector público pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2017/24/UE, do 26 de febreiro de 2014,

As partes comprométense a resolver de común acordo, ante a Comisión de Seguimento, calquera controversia que puidese suscitarse sobre a interpretación ou execución deste convenio.

As eventuais discrepancias derivadas do presente convenio que non poidan ser resoltas pola comisión de seguimento prevista na cláusula quinta, resolveranse polo procedemento previsto na Lei 16/2010, do 17 de decembro, de organización e funcionamento da Administración xeral e do sector público de Galicia, para os conflitos de atribucións.

### **OITAVA.- VIXENCIA**

Este acordo entrará en vigor ao día da súa sinatura, e estenderá a súa vixencia ata o 30 de decembro de 2022.

### **NOVENA.- MODIFICACIÓN**

Calquera modificación dalgunha das cláusulas deberá ser solicitada pola Igape á Fundación, quen decidirá sobre a súa procedencia, e no caso de aceptarse, se procederá á súa formalización mediante a correspondente "addenda".

O presente convenio poderá ser obxecto de modificación canto teña como finalidade o logro dos obxectivos de estabilidade orzamentaria e sostibilidade financeira.

### **DÉCIMA.- CAUSAS DE RESOLUCIÓN**

Serán causas de resolución do presente acordo:

1. Polo transcurso do prazo de vixencia do convenio sen acordarse a prórroga do mesmo.
2. Por acordo unánime das partes,





3. Por incumprimento por algunha das partes de calquera das cláusulas establecidas no presente Convenio. Calquera das partes poderá notificar á parte incumplidora un requirimento para que cumpra en quince (15) días coas obrigacións ou compromisos que se consideren incumplidos. Este requirimento será comunicado ao responsable da Comisión de Seguimento establecida na cláusula quinta do presente documento. Se transcorrido o prazo indicado persistise o incumprimento, a parte que o dirixiu notificará ás partes asinantes a concorrencia da causa de resolución e entenderase por resolto o convenio.
4. Por decisión de calquera das partes, se sobreviñesen causas que impedisen ou dificultasen de forma significativa a execución do Convenio, e sempre que sexa comunicado por escrito ás outras partes cunha antelación mínima dun mes.
5. Por decisión xudicial declaratoria da nulidade do Convenio.
6. Por calquera outra causa distinta das anteriores prevista no Convenio ou noutras leis.
7. As disposicións normativas ou, de ser o caso, acordos polos que extingan as partes ou se dispoñan outros usos para a Cidade da Cultura de Galicia.

Se, en caso de resolución do Convenio, existen actuacións en curso de execución, as partes, a proposta da comisión de seguimento, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.

A resolución por incumprimento da Igape extingue o dereito deste a reclamar indemnización algunha por ningún concepto.

#### **DÉCIMO PRIMEIRA.- PUBLICIDADE**

Este convenio será obxecto de inscrición en cumprimento do establecido no artigo 15 da Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia.

As partes asinantes autorizan/consentem a publicidade dos seus datos relevantes e persoais e demais especificacións recollidas no presente acordo de colaboración no Portal de Transparencia e Goberno Aberto.

Segundo o artigo 17 da Lei 1/2016, do 18 de xaneiro, ademais da información que debe facerse pública segundo a normativa básica en materia de transparencia, a Administración autonómica publicará o texto íntegro do acordo.

#### **DÉCIMO SEGUNDA.- NORMATIVA APLICABLE**

Para todo o non previsto neste convenio aplicarase o previsto na Lei 40/2015, do 1 de outubro, de réxime xurídico do sector público, así como na Resolución do 8 de abril de 1991 (DOG nº 82, do 30 de abril) pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, en todo o que non contradiga a primeira.

E en proba de conformidade co exposto, as partes asinan este documento na data indicada no pé de sinatura, tomándose como data de sinatura a do último asinante.

Pola Fundación Cidade da Cultura  
De Galicia:

Ana Isabel Vázquez Roberedo

Polo Instituto Galego de Promoción  
Económica:

Fernando Guldrís Iglesias

